

## LE CHAPITRE DE L'ORNEMENT

*contenant quatre-vingts neuf versets,  
escrit à la Meque.*

*Ekteri intitule ce Chapitre le Chapitre de  
l'Or.*

**A**V nom de Dieu clement & misericordieux. Dieu est Prudent & Sage. Je iure par le liure qui enseigne à bien faire que nous l'auons enuoyé en langue Arabesque, peut-estre que vous comprendrez l'Alcoran, il est escrit dans nostre liure original, majestueux & mysterieux. Vous celeray-je le liure de salut, si vous estes meschans? combien auons nous enuoyé de Prophetes & d'Apostres aux siecles passez que les infidelles ont mesprizez? mais nous auons exterminé les plus puissans d'entre eux & tous ont encouru la peine de leurs predecesseurs. Si tu leur demandes qui a créé le Ciel & la Terre, ils diront que c'est le Tout Puissant qui sçait tout. Qui a eutendu la terre dessous vous? Qui a estably les chemins pour vous conduire? c'est Dieu, il fait descendre la pluye du Ciel en vostre necessité, il en fait ressusciter les champs morts, secs & arides, ainsi les mors sortiront des monumens. C'est luy qui a créé tout ce qui est au monde de diuers genre & espece, &

qui a créé les nauires & les animaux pour vous porter. Souuenez-vous de la grace de vostre Seigneur, dites, loüé soit celuy qui nous a créé ces choses, nous n'auions pas le pouuoir de les créer, ils retourneront tous deuant le Seigneur pour estre iugez. Les infidelles ont diuisé Dieu en plusieurs parties. Certainement celuy qui dit qu'il y a plusieurs Dieux est vn impie, vous a-t'il ordonné de dire que les Anges qu'il a créé sont ses filles, puis qu'il vous donne des fils? lors qu'on annonce à quelques infidelles qu'il luy est né vne fille, il n'est pas satisfait (il desireroit auoir vn fils;) diront-ils que Dieu se pare, & qu'il prend des ornemens pour s'embellir comme leurs Idoles? C'est vn erreur manifeste, ils disent que les Anges qui adorent Dieu sont filles de sa diuine Majesté, i'ecriray ce qu'ils disent, & leur demanderay compte de leur discours au iour du Iugement. Ils ont dit, si Dieu eust voulu nous n'aurions pas adoré les Anges; Ils ne scauent pas ce qu'ils disent, & blasphement ignoramment, obseruent-ils quelque escriture qui leur ait esté cy-deuant enseignée? Au contraire, ils disent que leurs peres viuoient de cette façon, & qu'ils suivent leurs vestiges, ils en ont autant dit à tous les Prophetes que nous leur auons enuoyés. Lors que tu leur a dit d'observer ce qui est contenu dans l'Alcoran, & de laisser les Idoles que leurs peres ont adorez, ils ont respódu qu'ils ne croyent pas en toy ny en ta mission, mais nous nous sommes vengez d'eux, considere quelle est la fin des blasphemateurs. Souuiens-toy

qu' Abraham a dit à son pere & à ses gens, ie suis innocent du peché que vous commettez d'adorer les Idoles, ie n'adore que celuy qui m'a créé, il me conduira au chemin de salut, & a laissé ses paroles à la posterité; peut-estre que les infidelles se convertirôt. l'ay differé cy-deuant la punition des Idolatres, iusques à ce qu'ils ayent appris la verité, & qu'il leur soit venu vn Prophete pour les instruire; Lors qu'il leur a presché la verité, ils ont dit, que ce n'est que sortilege, & qu'ils n'y adiousteront pas foy. Si l'Alcoran eult esté enuoyé à vn homme Maistre & Seigneur de deux villes ou villages, ils l'auroient estimé & approuué, veulent-ils disposer des graces de Dieu? Il a partagé les biens du monde entre les hommes, il y en a qui sont plus esleuez, & se moquent les vns des autres, mais la misericorde de Dieu est plus aduantageuse que les biens de la terre qu'ils accumulent: Encore que tout le peuple ne soit pas tout d'vne mesme Religion, nous ne laissons pas de donner aux infidelles des maisons ornées avec des planchers lambrifsez d'argent, des escaliers, des portes & des lits d'argent & d'or; Ces choses sont les richesses de la terre, & le Paradis est pour ceux qui sont gens de bien. le feray precipiter avec les Diables ceux qui abiureront la loy du misericordieux, les Demons seront leurs compagnons, ils les deuoyeront du chemin de salut, & ne le cognoistront pas; lors que nous viendrons iuger l'Vniuers, ils diront, pleut à Dieu que nous eussions esté esloignez de vous autant que le Ponant est esloigné du

*C'est Ouid  
bin Ma-  
guirbe, &  
Arona  
bin Mes-  
roud, à qui  
les Ara-  
bes auoient  
creance.  
Voy kitab  
el senoir.*

Leuant; O quelle compagnie pour vous! au iourd'huy vostre repentir & vos esperances sont inutiles, vous auez este infidelles par compagnie, vous serez compagnons dedans le feu d'Enfer. Feras-tu ouyr les sourds & voir les auengles? conduiras-tu ceux qui se veulent deuoyer? s'ils meurent auant que d'estre punis en terre, ie me vengeray d'eux en l'autre monde. Te feray ie voir pendant ta vie la punition que nous leur auons preparée? nous le pouuons faire, mais faits seulement ce qui t'a esté commandé, tu es dans le chemin de salut, enseigne-le aux hommes, on te demandera compte de ta mission. Je demanderay compte de leur mission à ceux que nous auons cy-deuant enuoyez pour instruire le peuple, nous leur demanderons si nous leur auons ordonné d'adorer vn autre Dieu que nous. Nous auons enuoyé Moise à Pharaon & à ses ministres, il leur a fait voir nos miracles, & leur a presché nos commandemens, il leur a dit qu'il estoit messager du Dieu de l'Vniuers, neantmoins ils s'en sont moquez. Je ne leur ay point fait voir de miracles que ne soit plus grand que celuy de la sœur de Moise, & les auons chastiés à cause de leur incredulité. Ils ont dit à Moise, ô Magicien prie ton Seigneur qu'il nous deliure de ces maux & nous nous conuertirons, lors qu'ils en ont esté deliurez ils ont contreuenu à leurs promesses, & Pharaon à dit à son peuple, ne suis-ie pas le Roy d'Egypte, le fleue du Nil ne coule-t'il pas sous mon obeïssance? ne cognoissez-vous pas que ie suis plus puis-

fant que ce pauvre miserable Moïse qui ne sçait ce  
 qu'il dit ? Donnez-luy des bracelets d'or , nous ver-  
 rons si les Anges & ceux qui suiuent sa doctrine se-  
 ront tesmoins de la verité de ses paroles. Il a intimi-  
 dé ses subiets, ils luy ont obey, parce qu'ils estoient in-  
 fidelles, mais nous nous sommes vengez d'eux lors  
 qu'ils nous ont irrité, nous les auons submergés & les  
 auons fait seruir d'exemple à la posterité comme ceux  
 qui les auoient precedés dans l'impieté. Le peuple n'a  
 pas voulu escouter le Fils de Marie lors qu'il a parlé  
 par parabole, ils ont dit, nos Dieux nous sont plus  
 vtiles que ses mensonges, & que ses questions; Au  
 contraire ils estoient des pointilleux, il est nostre  
 seruiteur, nous luy auons donné nostre grace, & l'a-  
 uons créé semblable aux autres Prophetes des enfans  
 d'Israël: Si i'auois voulu i'auois créé en terre des An-  
 ges en vostre place, la venuë de Iesus Fils de Marie  
 sera vn signe de la certitude du iour du Iugement, ne  
 doutez pas de ce iour; Il a dit aux hommes, suiuez-  
 moy, c'est le droict chemin, prenez garde que le  
 Diable ne vous seduise, il est vostre ennemy décou-  
 uert. Le viens pour vous enseigner les commande-  
 mens de Dieu, pour resoudre les doutes, & iuger les  
 differens qui sont entre vous; craignez Dieu & luy  
 obeissez, il est vostre Seigneur & le mien, adorez-le  
 c'est le droict chemin; Le peuple a douté de sa do-  
 ctrine, mais malheur sera sur les impies, ils souffriront  
 de grandes peines au iour du Iugement, attendront  
 ils ce iour pour se conuertir, il les surprendra, & ne le

*Pharaon  
 faisoit  
 donner des  
 bracelets  
 de fer doré,  
 & des  
 coliers aux  
 criminels  
 & les fai-  
 soit pro-  
 mener par  
 la ville  
 par igno-  
 minie.*

*Voy Ge-  
 ladin &  
 Kirab el  
 tenoir.*

cognoissent pas, ce iour ils seront ennemis les vns des autres, Dieu dira aux gens de bien, n'ayez pas de peur, vous ne ressentirez point aujourd'huy d'affliction; Les fidelles qui ont obey à mes commandemens, entreront dans le Paradis, vous & vos femmes vous y resiouirez, vous beurez dans des coupes de fin or, vous y trouuezerez tout ce que vous desirerez, & tout ce qui peut contenter l'ame & resiouir les yeux, & demeurerez eternellement dans la suprême felicité, voila le Paradis que vous auez gagné par vostre bonne vie, il est enrichy d'une abondance de fruiçts que vous mangerez avec contentement, & les meschans demeureront eternellement dedans le feu d'Enfer, ils ne seront pas allegez en leurs miseres, & seront muets de desespoir, nous ne leur faisons point d'injustice, ils se font tort à eux-mesmes par leur desobeissance; Ils demanderont à l'Intendant du feu, ton Seigneur ne nous deliurera-t'il iamais de ces peines? Il leur respondra, vous y demeurerez eternellement. Nous auons enseigné la verité aux hommes, mais la plus grande partie ne l'a pas voulu croire. Les meschans ont conspiré contre toy, & nous auons conspiré contr'eux, pensent-ils que ie ne sçache pas leur secret & tout ce qu'ils disent? Les Anges nos Messagers en tiennent compte; Dis leur, si Dieu a vn enfant, quel adorons-nous le premier? Loué soit Dieu, Roy des Cieux & de la Terre, la chose n'est pas comme les infidelles la racontent; Laissez-les plonger dans leur impiété, laissez les rire & jouïr iusques

à ce qu'ils arriuent au iour de leur punition, vn Dieu seul doit estre adoré au Ciel & en la Terre, il est tres-sage & sçait tout. Loué soit celuy à qui appartient le Royaume des Cieux & de la Terre, & tout ce qui est entr'eux. Il sçait l'heure & le iour que tout le monde sera assemblé deuant luy pour estre iugé. Les Idoles que les infidelles adorent ne pourront pas interceder pour eux, les bons intercedent pour ceux qui ont cognoissance de la verité; si tu demande aux hommes qui les a créés, ils diront que c'est Dieu; comme se peuuent-ils donc esloigner de ses commandemens? Seigneur ce peuple est incredule. Esloigne-toi de leur compagnie, à la fin ils recognoistront trop tard leurs erreurs.

*LE CHAPITRE DE LA FVME'E,  
contenant cinquante-neuf versets,  
escriit à la Meque.*

**A**V Nom de Dieu clement & misericordieux. Dieu est prudent & sage. Iciure par le liure qui distingue le bien d'avec le mal, que nous l'auons enuoyé la nuit de benediction, pour enseigner au peuple les tourmens de l'Enfer; Ce liure explique nos commandemens & tout ce que nous auons cy-deuant ordonné aux Prophetes, c'est vne grace speciale de ton Seigneur, il entend tout & sçait tout, il est le